

**DULLIAU GWEITHREDU AR GYFER RHEOLI ACHOS
A DYBIR SY’N TORRI DIOGELWCH DATA**

Dyddiad	Diben Cyhoeddi/Disgrifiad o’r Newid	Asesiad o'r Effaith ar Gydraddoldeb wedi'i Gwblhau
5 Hydref, 2009	Cyhoeddiad Cyntaf	
16 Gorffennaf 2018	Adolygu a diweddaru	
22 Medi 2022	Adolygu a diweddaru	

Swyddog Polisi	Uwch Swyddog Cyfrifol	Cymeradwywyd gan	Dyddiad
Swyddog Diogelu Data	Ysgrifennydd y Brifysgol	Grŵp Tasg Cydymffurfio	22 Medi 2022

Caiff y polisi hwn ei adolygu ymhen blwyddyn.

DULLIAU GWEITHREDU AR GYFER RHEOLI ACHOS A DYBIR SY’N TORRI DIOGELWCH DATA

1. Cyflwyniad

Dan ofynion Deddf Gwarchod Data 2018, mae'n orfodol rhoi gwybod am achos o fethu â gwarchod data os yw hynny'n debygol o arwain at risg i hawliau a rhyddid pobl. Rhaid rhoi gwybod am achosion o fethu â diogelu data i Swyddfa'r Comisiynydd Gwybodaeth o fewn 72 awr ar ôl i'r Brifysgol ddod i wybod amdanynt.

Rhaid i'r Brifysgol felly gymryd mesurau priodol yn erbyn prosesu data personol heb awdurdod neu'n anghyfreithlon, ac yn erbyn colli data personol drwy ddamwain, eu dinistrio neu eu difrodi.

Mae'r dulliau gweithredu hyn yn nodi sut bydd y Brifysgol yn rheoli achos y rhoddir gwybod iddynt a dybir sy'n torri diogelwch data.

Gall torri diogelwch data ddigwydd am nifer o resymau:

- Colli data neu offer ar yr hyn y cedwir y data, neu ladrad o'r cyfryw bethau
- Rheoliadau mynediad amhriodol sy'n caniatáu defnydd heb awdurdod
- Methiant offer
- Gwall dynol
- Amgylchiadau na ragwelwyd, fel tân neu lifogydd
- Ymosodiad hacio
- Troseddau 'blagio' lle ceir gwybodaeth drwy dwyllo'r sefydliad sy'n ei dal

Wrth reoli unrhyw achos a dybir o dorri diogelwch data, bydd y Brifysgol yn cymryd pedwar cam eglur:

- Atal ac Adfer
- Asesu Risgiau a hysbysiad pellach
- Gwerthuso ac Ymateb

2. Rhoi gwybod am Fethu â Diogelu Data

Rhaid rhoi gwybod am unrhyw achos a amheuir o fethu â diogelu data i'r Swyddog Diogelu Data, neu'r Pennaeth Gwasanaethau Cyfreithiol, cyn gynted ag y gellir, ac yn sicr o fewn 24 awr, fel y gellir gweithredu'n briodol i atal y methiant ac adfer y sefyllfa:

Ebost: info-compliance@bangor.ac.uk

Rhif ffôn: 01248 388525 neu 388530

3. Atal ac Adfer

Mae achosion a dybir sy'n torri diogelwch data yn gofyn am i'r Brifysgol ymchwilio i'r sefyllfa a'i hatal, a hefyd llunio cynllun adfer a fydd yn cynnwys, lle bo angen, unrhyw gyfyngiad ar ddifrod.

Ar ôl cael gwybod am achos a dybir sy'n torri diogelwch data, bydd y Swyddog Diogelu Data yn cymryd camau i archwilio, a bydd yn gwneud y canlynol yn benodol:

- Canfod pwy sydd angen cael gwybod am yr achos, a rhoi gwybod iddynt yr hyn y disgwyllir iddynt ei wneud i gynorthwyo â'r ymarferiad atal. (Gall hyn gynnwys, er enghraifft, ynysu neu gau rhan o'r rhwydwaith a beryglwyd, cymryd camau i ganfod darn o offer sydd ar goll, neu newid y codau mynediad ar ddrws);

- Canfod a oes unrhyw beth i'w wneud i adfer unrhyw golledion a chyfyngu'r difrod y gallai'r achos o dorri diogelwch data ei achosi;
- Lle bo'n briodol, rhoi gwybod i'r heddlu.

4. Asesu Risgiau a hysbysiad pellach

Cyn penderfynu pa gamau eraill sydd eu hangen ar wahân i'r rhai a gymerwyd i atal yr achos ar unwaith, bydd y Swyddog Diogelu Data, mewn ymgynghoriad â'r Pennaeth Gwasanaethau Cyfreithiol a'r Ysgrifennydd y Brifysgol / Pennaeth Gwasanaethau Llywodraethu, ar ran y Brifysgol, mewn ymgynghoriad â'r Deon Coleg, Pennaeth Ysgol ac/neu Gyfarwyddwr Gwasanaeth Proffesiynol perthnasol yn gwneud asesiad cychwynnol o'r risgiau a allai fod yn gysylltiedig â'r achos hwnnw.

Fel rhan o'r broses asesu hon, dylid ystyried p'un a oes angen rhoi gwybod am y digwyddiad i swyddfa'r Comisiynydd Gwybodaeth. Wrth wneud yr asesiad hwn, caiff y ffactorau canlynol eu hystyried:

- Pa fath o ddata sydd dan sylw?
- Pa mor sensitif ydyw?
- Os collwyd data neu os ydynt wedi cael eu lladrata, a oes unrhyw amddiffyniadau mewn grym megis amgryptio?
- Beth sydd wedi digwydd i'r data?
- Beth allai'r data ei ddweud wrth drydydd parti am yr unigolyn?
- Data personol faint o unigolion yr effeithir arnynt gan yr achos?
- Pwy yw'r unigolion y torrwyd diogelwch eu data?
- Pa niwed allai ddod i'r unigolion hynny? A oes risgiau i ddiogelwch corfforol neu enw da, neu risg colled ariannol, neu gyfuniad o'r rhain ac elfennau eraill o'u bywyd?
- A oes canlyniadau ehangach i'w hystyried, fel risg i iechyd y cyhoedd neu golli hyder y cyhoedd?
- A yw mynd yn groes i'r polisi yn debygol o achosi i unigolyn ddioddef rhyw fath o ganlyniad andwyol posibl?

Dylai asesiad o ganlyniadau niweidiol posib i unigolion, pa mor ddifrifol neu sylweddol yw'r rhain a pha mor debygol ydynt o ddigwydd (e.e. colled ariannol, dwyn hunaniaeth neu dorri cyfrinachedd) hefyd ystyried y ffactorau canlynol, yn cynnwys rhoi gwybod i'r unigolion eu hunain:

- A oes unrhyw ofynion cyfreithiol neu gytundebol?
- A all hysbysu helpu'r Brifysgol i gyflawni ei rhwymedigaethau diogelwch o ran y chweched egwyddor diogelu data¹?
- A all hysbysu helpu'r unigolyn i reoli'r risgiau, er enghraifft, drwy ganslo cerdyn credyd neu newid cyfrinair?
- Sut gellir gwneud hysbysu'n briodol ar gyfer grwpiau penodol o unigolion, er enghraifft, plant neu oedolion agored i niwed.
- Pwy fydd y Brifysgol yn eu hysbysu, beth ddywedir wrthynt a sut y rhoddir y neges iddynt?
- Pwy arall ddylid eu hysbysu, er enghraifft trydydd parti fel yr heddlu, yswirwyr, cyrdd proffesiynol, banc neu gwmnïau cardiau credyd.

Ar ddiwedd y cam hwn bydd y Swyddog Diogelu Data yn ysgrifennu adroddiad llawn o'r prosesau asesu a gyflawnwyd hyd yma, a chyflwynir hwnnw i'r Grŵp Gwerthuso fel yr amlinellir yn Adran 5 isod.

1 Proseswyd mewn ffordd sy'n sicrhau diogelwch priodol y data personol

Os penderfynir bod angen hysbysu Swyddfa'r Comisiynydd Gwybodaeth am y digwyddiad, dylai'r Swyddog Diogelu Data wneud hynny ar ddiwedd y cam hwn, a beth bynnag o fewn 72 awr i gael gwybod am yr achos dan sylw.

5. Gwerthuso ac Ymateb

Mae'r Brifysgol yn cydnabod ei bod yn bwysig nid yn unig i ymchwilio i achosion unrhyw dorri diogelwch data, ond hefyd gwerthuso effeithiolrwydd ymateb y Brifysgol iddynt.

Mewn achos difrifol o dorri'r polisi, neu ei dorri dro ar tro, bydd y Swyddog Diogelu Data yn galw Grŵp Gwerthuso ynghyd gyda chyfansoddiad craidd yn cynnwys:

- Cadeirydd y Grŵp Tasg Cydymffurfio, fydd yn dod yn Gadeirydd y Grŵp Gwerthuso
- Pennaeth Llywodraethu a'r / neu Pennaeth Gwasanaethau Cyfreithiol
- Y Deon Coleg, Pennaeth Ysgol a / neu Gyfarwyddwr Gwasanaeth Proffesiynol priodol a bennir gan natur y torri diogelwch data
- Rheolwyr gweithredol perthnasol a bennir gan natur y torri diogelwch data.
- Y Swyddog Diogelu Data

Wrth lunio ei gasgliadau, bydd y Grŵp Gwerthuso'n cymryd i ystyriaeth y materion allweddol a ganlyn mewn perthynas â'r torri diogelwch data:

- Beth yw'r gwersi sydd i'w dysgu?
- A all y Brifysgol fodloni ei hun ei bod yn gwybod pa ddata personol a gedwir ac ymhle a sut cânt eu cadw?
- Mewn cysylltiad â data personol, beth ac ymhle mae'r risgiau mwyaf i'r sefydliad? Er enghraifft, ymhle cedwir data categori arbennig?
- A yw'r risgiau'n gysylltiedig â rhannu neu ddatgelu data wedi eu nodi a'u rheoli'n addas?
- Beth yw'r pwyntiau gwan posibl ym mesurau diogelwch presennol y Brifysgol – fel defnyddio dyfeisiadau storio cludadwy?
- Sut mae ymwybyddiaeth staff o faterion diogelwch yn cael ei fonitro, a llenwi unrhyw fylchau drwy hyfforddiant neu gyngor wedi'i addasu'n arbennig.

Dylai Cadeirydd y Grŵp Gwerthuso gyflwyno adroddiad llawn i'r Grŵp Tasg Cydymffurfio yn ei gyfarfod nesaf, yn cynnwys unrhyw argymhellion allai gynnwys gweithredu yn unol â Threfn Disgyblu'r Brifysgol.